




Blank page with a dark rectangular area on the left side.



范文正公集

明康丕揚士遇校

屬吏毛九苞訂

年譜補遺

前譜所載公事多有闕遺今取其未載者見之逐年之下

明道二年八月公時為江淮安撫勘會真楚泗州有發運司轉般斛斗差撥綱運於三處裝發粳米大小麥豌豆等共五十萬石救濟沂密徐兗

等州九月體量淮南州軍賒糶人民二麥并賒
買亭民鹽貨未有見錢支給并向春逐處缺乏
軍儲亦無錢和糶奏乞借賜錢五十萬貫并足
帛香藥三五十萬下淮南軍州應副前項支贍
又體問得諸軍州自來和糶當農民出糶被行
人抑壓價例收糶不時致穀以百千計已入商
買之家方始添價出糶是以大段虛費官錢又
不濟得農民奏乞許農民作保申乞先請價錢
限一月內入納免被經販人隔截農民不得抑

勒令請領十月奏為蘇常秀潤旱蝗乞依吳遵
路所奏權罷配糶斛斗又自江寧府乘遞馬到
潤州起發楚州等處斛斗往廬壽登萊等州時
江淮州軍有因疾疫死亡人口種蒔不敷田段
甚多公牒逐官依災傷一例體量放減并孤貧
老幼不濟人戶多無田苗除減放外移稅數不
多者虛煩催科無可送納即與全放十一月牒
江淮災傷州軍應實因災傷逃移拋下稅產已
曾申報州縣後來雖是未差官檢覆今却歸業

文正公集 禮道 二
者並放免稅賦及有已曾歸業為官中令納稅
存濟不得又逃移者亦許歸業依此減放稅科
十二月奏乞免放舒廬等州折役茶又看詳江
寧府上元縣等處所管主客戶口通年送納鹽
錢即不曾請鹽食用其客戶鹽錢數不多欲乞
朝廷特與除放

景祐元年正月薦丁鈞鄧資徐執中衛齊盧革李
碩張弁並公廉文雅為衆所稱堪克京官如擢
用後犯入已贓甘當同罪時黎德潤無辜獄死

公奏乞訪求本家骨肉量與支賜令其收葬仍
乞指揮令後命官使臣犯公罪流已下贓罪徒
以下並不禁係許責保出外聽勅

康定元年正月十二日牒環慶路今後如有報到
賊馬深入廊延路更請相度一面部領軍馬入
賊界攻討要害城寨領官大段殺獲分張賊勢
不得只在界首及打虜些少族帳便為策應之
名若環慶有賊馬亦令廊延路分擘諸頭出軍
馬深入賊界攻討十五日陝府申稅戶朱大成

等八百九戶各於送納秋稅不前拋下稅額全家逃走公牒陝府指揮逐縣鄉村拘管上件逃移人戶屋業生產不得燒燬斫伐其逃移人口即與倚閣去年秋稅招誘歸業免致逃移毀却桑產將來歸業不得即大段虧失省稅所有諸州軍人戶慮恐亦有似此逃移并牒逐州亦請相度安恤樞密院劄子奉聖旨西界首領約遇没兀等二人部領蕃賊七百餘人在塞門寨駐泊其部署司為何不差人馬掩殺公言延州去

塞門寨並無人烟又行川路之中一水屈曲五七十處涉渡恐傷兵士脚手周迴又無舊日熟戶縱得此寨其勢孤絕亦恐難為駐兵以此不如訓練兵士候春暖可以涉水或輕兵掩襲或大軍攻賊縱被棄去自家兵士不致有損○二月八日奏上延州熟戶見今饒餓若春深無田可耕別思作過或虜劫漢戶北入橫山則延州東界大有憂事乞興脩廢寨御前劄子付夏竦仰一面與范仲淹計會商量但應機乘便可以

出師即同謀進取又聖旨令范仲淹於鄜州與
夏竦韓琦商議邊事十二日奏乞相度禁放青
鹽利害事十四日公有疏奏答朝旨論公討西
賊利害十七日奏張建侯狄青等與西賊戰于
保安軍有功乞重加錫賜公嘗舉歐陽公充本
路掌書記尋詔除館閣不赴任十七日公上言
竊見著作佐郎通判天雄軍張方平富於文學
復有才用乞朝廷改除充本司掌書記取進止
是月二十四日牒張亢修豐稊城及禹安寨又

牒朱吉任守信种世衡高良夫相度東路承平
南安兩寨如久遠可守即進兵前去修復是月
二十五日又奏乞修廢寨○三月初一日牒青
澗城种世衡永平寨郭延珣等接此春暖耕農
之時速勘會上件驚移熟戶蕃部如內有未敢
歸業依舊耕種即便相度隣近有無官司空閑
地土或遠年迹田權撥與耕種如無牛具者官
與量借錢收買常切安存無令失所初二日又
奏那兵馬五萬防托秦州時知保安軍王信西

路巡檢狄青自來入陣勇猛公恐其為賊所誘二十八日奏乞指揮二人令持重不須身自鬪敵○四月五日差周美楊麟陳永圖等脩復萬安寨豐稔城甘泉城已畢公又相度將興修承平南安新寨等十一日牒种世衡郭延珣等據的是見闕乏糧草蕃部相度逐戶口數目每十口已上官中量支借貸糧粟各一石十口已下各借五斗仍常切照管安存無令失所○六月奏乞指揮逐路將諸軍弓弩手教習短兵又乞

揀選武士充節級○七月十五日舉孫沔田况充經略判官又舉胡翼之充本司催驅公事○八月一日舉劉牧錢中孚等十七人充陝西差遣時延州金明寨招到殘破蕃部三百二十八戶雖給與田土無力耕種缺少糧食公奏體量延州西北被西賊破蕩兼知延州張存母年八十寄泊他郡人子之心宜不獲安伏乞別選人知延州如未選得間即令臣知延州所貴依得約束訓練兵馬十八日公牒延州通判大理寺

丞高良夫將本寨見管熟戶蕃部等每家十口已下各支斛斗二石其十口已上支三石公巡邊到延州據左侍禁王聰狀陳弟王繼元差在寨門寨權兵軍監押被蕃賊打破寨門相殺身死二十日為奏聞朝廷乞特賜獎錄以勸死節之士○初鄜州至延州一百六十里元是三程於新店牢山各有館驛後減廢○九月公與轉運使明鎬巡歷自鄜州至延州兩程遇晴明皆昏黃後方到驛程太遠山坡至多及巡歷回來

却值泥雨崖路險滑三十餘度涉河自甘泉縣蚤發至晚只到得皇甫店去鄜州尚更兩鋪所有隨行軍馬已各疲乏便無喫食須用回買其軍馬既不到驛即無支請草料去處兼是山居無可收買遂牒延州將牢山新店館驛量行脩補及存留甘泉新置驛每有過往使命軍馬或遇晴明直中路甘泉縣即支給一日口食糧草或遇雨雪并山河水漲即於新店牢山勘請止宿十六日奏乞放免張亢斬軍不當罪名是月

奉聖旨節文令公密切厚支與金帛召募敢死之士深入賊境探候等事公言臣在延州差韓周張宗永齎送文字直到吳賊處二人不期為臣所累皆竄遠方今雖奉聖旨令臣募人入賊界臣何面目更可使人伏乞勾還韓周張宗永量加恩澤○十月初一日巡檢李惟希下兵士王義等四人作鬧扇搖軍人公到延州據司理院勘到並斷送葛懷敏軍前要斬初五日公牒朱觀將領兵軍計會王達朱吉王守琪張宗武

自鄜州西北入德靜寨進兵討掠族帳又牒葛懷敏將帶周英鄭從政部領兵馬離延州往保安軍逼逐蕃賊仍差劉政充先鋒取路深入破蕩部署初九日又奏乞逐路部署已下出入進退處置軍馬公事並聽經略安撫都部署司諸使處分時西賊大將剛浪唆兵馬最為強勁在夏州東彌陀洞居止又次東七十里有鐵冶務即是賊界出鐵製造兵器之處去河東麟府界黃河西約七八十里可出麟府并召隰州兵馬

與延州兵馬會合掩襲以分賊勢
惟朱觀父在麟州知得次第已曾密議奏乞令
朱觀計會河東軍馬以幹此事鄜州曹司馬勳
張式黃貴斌尅兵士請受公言當此軍期之際
兵士多是饑寒逃亡若更減尅轉難存濟遂牒
鄜州將馬勳等三人對諸軍處斬又奏脩城及
般運糧草工役辛苦地又惡寒日有逃亡乞每
月支醬菜錢是月十二日公上言陝西軍州自
西事以來應副軍期科率百出如官員得人稍

能均濟或知寬猛則不致於殘民其不得人處
政在胥吏因其急速得恣貪暴既屬軍期民無
所訴臣自膺寄任奏薦頗多乞朝廷深加照察
知非請托其所奏之人多是僥倖優穩之處永
祝辭免不來赴任朝廷遂一夫之私情忘百姓
之深患滿目疾苦將何以濟伏望聖慈特賜愛
軫應陝西所奏官員曾經免者除別有擢用外
却乞盡底催發前來赴任十七日公具諸將所
獲生口鞍馬畜產器械并首級具聞于朝十八

日保安軍奏乞早降宣命下本路轉運使司并
經略安撫使副火急於近裏州軍人戶秋稅內
科撥赴本軍公體量得延州至保安軍山路一
百五十餘里昨因西賊侵擾燒却人戶田土則
各逃散公路不住有蕃賊出來打劫若令近裏
州軍人戶就保安軍輸納轉見苛虐於民不便
公遂擘畫只將廊延兩路界近保安軍送納公
將部將任福打破白豹城蕩四十餘里狄青黃
世寧到盧子平捉到西賊婦女朱觀打破洪州

一十餘寨并族帳二十餘處二十八日奏乞不
禁青鹽二十九日奏乞朝廷念及邊遠之人率
多無告特告朝旨應舉充縣令人限一季內並
與移陝西路如在沿邊州軍即便乞與除職官
知縣如人數不足即乞委清望官於三舉已上
進士有行止文學者具事狀連坐各薦一兩人
不致闕官辦集邊事○是歲十一月虎翼軍第
九指揮王瓊奪長行于興斫到人頭作自己功
劄上名字申奏宣轉充下名正指揮使後于興

告訴問訖招伏公書斷云奪戎士死戰之功誤
朝廷重賞之意其王瓊集軍員等處斬又奏乞
建故寬州為青澗城十三日奏狄青黃世寧頗
勇氣乞蚤加獎用十六日奏張繼勲破賊於歸
娘谷乞賜酬獎十七日時陝西軍州每年夏稅
支移在邊上送納民疲於役公又上言乞令於
陝西近棗州軍送納則惜得百姓時自京起發
兵馬來陝西邊上州軍駐劄訪知押軍使臣內
有懦弱生疎不能鈐轄致兵士在路作過攪擾

縣鎮十九日公牒鄜同華州河中府如軍馬經
過相度使臣稍有生疎不能鈐轄便請那差都
監監押一員或差得力使臣支與驛券同共管
押逐州交割不得縱令不著次第及攪擾縣鎮
施行十一月差張建侯與狄青黃世寧劉政在
保安軍差鄭從政在萬安鎮又牒鄜州令張宗
武往敷政縣且令探候如近邊寨無備則便行
討擊二十六日奏舉种世衡知環州○十二月
初二日乞陞擢滕宗諒差赴陝西必可濟辦邊

事時清邊弩手新到州司不敢依例給錢公言
沿邊苦寒之地所有晉州清邊弩手指揮人員
兵士已到延州例各單寒闕少衣裝初四日遂
牒延州一例支給○十二月十二日奏乞朝廷
特降指揮下京西陝西嚴切鈐束如有兇惡即
行軍法十六日牒同州抽差北縣分弓手二千
人并牒河中府抽差弓手一千人並差使臣押
送鄜城縣駐劄把隘防托又牒耀州郡兵士兩
指揮赴坊州防托時關中諸郡支移百姓苗稅

配納糧草往邊上州軍送納惟鄜延一路最是
辛苦糜費數倍蓋是山陵道路不可通大車只
是小車并驢子般運或遇晴明則一月程僅可
往還或值雨雪艱難寸進至有離家四五十日
裹纏乾糧並盡却更那人歸取盤纏今延州稈
草每束一百七十文其關中百姓秋稅入邊上
送納每束稈草只折三十文若據在市價頗甚
虧民公相度得鄜州鄜城縣後魏時為鄜城郡
隋為僖州南至同州河中府各是四程北至鄜

文正公集 禮遺 三
州兩程至延州五程物價稍賤奏乞朝廷建廊
州為軍令建營房倉廩解舍所有同華河中府
以來州軍近下等第苗稅只於此處送納且減
得一半惡路至春却那減廊延軍馬於此處屯
泊就得賤價糧草稍減得百姓勞弊辛苦亦且
近便徃復十二月二十八日奏乞暫出延州賞
給熟戶蕃部首領給與文帖并散茶綵內有功
勞異於衆者等第支給襖子腰帶係蕃部巡檢
者給與紅纓交椅仍與別立約束令遞相鈐轄

准備點集時聖旨令公與梁適商量邊稅事公
奏乞指揮涇原路招安明珠滅臧二族時邊上
臣僚陳乞買馬纔得宣頭便令人於熟戶及百
姓公人之家覷步收買其差去人接便起動熟
戶取奉虧價強買邊上新舊官員各稱准宣買
馬無時了絕徃徃一道宣頭應帶數疋公乞朝
廷降指揮將買馬宣頭並乞勾收繳納

慶曆元年是歲春正月公在延州朝廷既用韓琦
等所畫攻策先戒師期公言正月內起兵塞外

雨雪大寒暴露僵仆使賊乘之必有所傷願朝廷存此一路未行討伐容臣示以恩信或可招納戊午詔從公所請時公前凡六奏卒城承平等十二寨蕃漢之民相踵復業○二月四日奏乞於諸寨置權場用足帛等博買熟戶將到青鹽只於慶環二州添起一倍價錢出賣收得一色見錢糴買糧草及支諸軍請受大段減得近理見錢應副邊上○三月任福等既敗朝議因欲悉罷諸路行營之號明示招納使賊驕怠仍

密收兵深入討擊詔范仲淹體量士氣勇怯公言任福已下皆邊上有名之將尚不能料賊今之所選徃徃不及更令深入禍未可量於是行營之號卒不罷兵亦不復出○四月徙知慶州兼管勾環慶路部署司事初元吳陰誘屬羌為助環慶酋長六百人約與賊為鄉道後雖首露猶懷去就公至部即奏行邊以詔書犒賞諸羌閱其人馬立條約諸羌受命悅服自是始為漢用初曹瑋於環慶添置六寨差田敏部轄軍馬

在彼防托至今熟戶倚此城寨四月公奏乞聖
慈以曹瑋田敏前後戰功并建寨托邊之利特
加贈典其直下子孫量行恩澤以獎勸邊士六
月陝西體量使王堯臣言范仲淹韓琦皆天下
選其忠義智勇名動夷狄不宜以小故置散地
○先是一月聖旨令擘畫牽制西賊不令往河
東作過公牒本路主兵官員盡底部領戰兵往
沿邊入界牽制併擘畫合行事件指揮逐路主
兵官員施行十月初五日將所行事件畫一具

奏○十一月二十一日舉劉貽孫及葛宗古二
十六日乞將以所授左司郎中一官回授种世
衡與轉諸司使知環州是月梁適自陝西還公
附奏攻守二議○是月奉聖旨體量鈐轄都監
十二月初七日奏乞改移張明郝緒

慶曆二年時蕃部巡檢趙明勾招到賊界偽署團
練使訛乞并手下蕃官等共二十三戶公定奪
賞賜銀椀頭巾角茶交椅銀帶錦襖等物那與
繫官房舍居住正月初二日公奏乞為蕃官訛

文正公集
卷之六
七等補官十一日到環州管設蕃官支與銀綵等物與立約束蕃部喜躍二十九日再舉种世衡知環州時牒各寨逐月一度勾集蕃官管設又恐公用錢物使用不足又牒環州僉判陰諒臣往逐寨標撥官地種蒔蔬菜貨賣并諸蕃部贓罰添助公用去託所貴不破省錢是月公到邠州排揀新兵據人戶王招瑋等陳告稱官中脩營占却園林地土拆了屋舍乞估計合支價錢公牒委邠州請依上項條貫支給逐人價錢

及除放隨地錢稅後邠州准轉運司牒勾收已支價錢公言雖准都轉運司指揮令將空闕官地兌還既無官地即合回申都轉運司豈得故違條貫並不回申便却例行催納已支價錢侵害人戶勾到本州元行典級王孟等取勘招伏上項有違條貫情罪杖一百上斷遣差人押送本州收管所有上件人戶地土價錢却牒邠州依條支遣○二月四日太子中舍通判延州高良夫奏乞下陝西四路令銷兵士防托州軍

一依范仲淹原書先定下守城人數於近襄州
軍輪差者前年充數次遣州軍于箭手却輪差
在極邊城寨奉聖旨且令邠寧環慶路諸都部
署固相度有無妨礙且利害疾速聞奏公言相
度所差弓手並是人戶三丁內破一丁充役若
是撥於極邊州軍屯戍緣邊上食物踊貴亦少
營倉官中請受至薄難裹纏必於本家骨肉處
頻有呼索動是數百里本家更破一名往來供
送即是一戶三丁之內二丁防邊徒使破壞家

產伏乞朝廷更請相度二月奏言延州陷破前
年西賊圍閉之時山城未曾修築微有墻壘未
能禦捍惟劉平星夜前來救濟得延州不至陷
破此實劉平忠勇之力今來子弟復在邊任其
跡孤危未能雪耻竊聞劉平尚在恐邊臣有所
憎愛別造飛語乞朝廷倍賜照管又言計用章
無不順之意乞與叙用初五日有看詳趙珣所
奏畫一奏疏時樞密院劄付經略司諸將在外
者若賊寇大至並須領兵覓便攻擊二十五日

公言將有勇怯師有衆寡用兵無常勢非可畫
一而制者也乞朝廷指揮逐路主帥近雖降此
指揮仰更體量將之強弱敵之衆寡地勢險易
天時明晦臨事取分以保民安邊事為重庶少
敗事其樞密院指揮未敢施行○三月七日奏
陝西不可行用鐵錢○四月令李丕諒宋良移
風川寨於烽火臺山上尋令弓箭手兵士等寅
夜興工山上只築女牆四面削壁近下低處築
城圍入水泉續又牒本州通判太常博士范祥

與李丕諒等同相度新脩寨城已而又分擘街
巷脩蓋軍營倉草場解署及城上置軍舍般運
糧儲兵甲入新寨二十八日奏舉高瑞高良夫
楊畋○寧州狀申稱於五月五日申時以後忽
降猛雨風電雷電有大霹靂一聲於草場火發
燒却稈草四千餘束轉運司令觀察推官劉銑
置院取勘公言逐處異物蟄藏之處多致雷火
合依邊勅指揮只令陪納入官若更須令根勘
官吏不切防慎罪狀却慮今後沿邊倉場作過

要得負累官員為害轉大願乞朝廷特賜釋免
二十四日奏舉焦遂卿李顯張忠張信等乞與
轉官二十九日體量得環州界爾遠馬領定邊
安和安塞等寨軍馬糧人戶草木不少並各城墻低
下濠塹淺狹未得牢固遂牒環州立便刷那廂
軍兵士脩築開淘○六月初六日石昌鎮申梁
家族蕃官屈都等并小遇族蕃官薛娘等為讐
其梁家族點集一千餘人騎待報讐相殺公又
差指揮使郭慶宗齎銀椀綵絹走馬往本鎮體

量各且和斷之○閏九月初九日慶州北路都
巡檢司狀申探得吳賊親領八萬人騎奔往鎮
戎軍去遂牒寧州通判張去惑著作暫往邠州
計會點檢城上防城戰具家事安排整齊如聞
西賊大入漢界即起遣鄉村人戶入州其人戶
多是少得柴草不願入城即官中擘畫棟損稗
草支借十九日諸處申探到西界點集蕃賊馬
大段緊急公差焦遂卿种世衡等點集蕃兵防
托所有老小牛羊並發遣入寨城迴避其候看

族帳田苗蕃部即令於高險上空處權時就藏
避其入寨城人口並依先降條貫支與口食并
鞍馬草料牛羊即令於側放牧如遇閉圍三五
日間亦借與稗草准涇原路經略招討司牒今
月十日夜一更時准副使葛懷敏公文及鎮戎
軍號紙申蕃賊不知數目奔充圍遶三川定川
寨公牒張建侯策應探事軍人張遇分析狀稱
今月二十二日早辰到鎮戎軍西南蓮花堡德
勝堡見自家軍馬與蕃賊相殺又見向太保劉

太保手下軍馬被蕃賊殺散所有自家軍馬總
在定川寨與蕃賊相殺公令鈐轄李丕諒領軍
馬於二十日起發計會張建侯同往原州會合
策應○十月二十八日入內侍省西頭供奉
官王懷德齋降御前劄子問當欲移卿往涇原
路為本路近經賊馬抄掠藉招緝與文彥博對
換公乞依舊領環慶路職任同涇原路經略並
於涇州駐劄與韓琦日夜聚首三二年間可期
平定時渭州鎮戎軍寨主職田有每歲獲千餘

貫延州慶州諸寨多無職田十月二十八日奏
乞均定諸寨官員職田○十一月初六日公上
言涇原土兵有在慶州者慶州土兵有在涇原
路者山川道路既不諳練又是邊上土兵請受
微薄拋離本營裹纏不易公欲朝廷指揮逐處
土兵各令撲歸本路使喚公私俱便是月復置
陝西四路都部署經略安撫兼沿邊招討使命
韓公及公龐公分領之公與韓公開府涇州
而徙文彥博帥秦宗諒帥慶皆徙公之請也甲

申以處士孫復為國子監直講徙公與富公之
薦也○十二月西賊入山外打并原州打虜公
牒知原州景奏與當路鈐轄李丕諒等六人部
領軍馬計會節次向前於鎮戎軍以來會合出
竒伏截山外回來賊馬收救人民公又到邠州
示以兵勢出榜永興軍諸州以安衆心又與都
監張肇部領諸兵馬於初三日發離邠州取長
武路往涇州策應

慶曆三年正月辛卯詔陝西沿邊招討使韓琦凡

軍期中覆不及者皆便宜從事宣命指揮召募沿邊少壯人為護塞指揮公言其不便○二月已卯保安軍狀申廊延經略司牒報西人請和公上言有不可許者三有大可防者三○三月甲午上令內侍宣諭韓琦范仲淹等候邊上稍寧當用卿等在兩地又令琦等密奏可代處邊任者琦等言元昊雖約和誠偽未可知願盡力塞下不敢擬他人為代○四月庚申諫官蔡襄言伏見陝西路招討使范仲淹韓琦各除樞密

院副使並以西寇未寧懇辭乞朝廷不聽辭讓各授恩命二十四日公起發往邠州提舉并就近勾抽乾耀州新兵請知州通判內一員押赴一依宣命指揮重行揀選并排連人員及指畫閱教次第并商量定奪蓋造營房○五月江淮歲漕不給京師乏軍儲發運非人公言國子博士許元可獨倚辦辛未擢元江淮兩浙荆湖制置發運判官京師乏食辛郊公與韓公又言臣等切以天下郡邑牧宰為重得其人則致化失

其人則召亂推擇之際不可不謹雖曾詔臣寮
各舉所知或舉主非賢則多謬薦臣等欲乞聖
慈特降詔書令中書樞密院臣僚各於朝臣中
薦堪充舉主者三人候奏到姓名即逐人各賜
勅一道若將來顯有善政其舉主當議旌賞若
賊汙不理苛刻害民並與同罪所貴生民受賜
寇盜自息從之○十月初五日用張昱之為河
北都轉運按察使王素為淮南都轉運按察使
沈邈為京東轉運按察使從公與富公之言也

慶曆四年二月切見審官三班院并銓曹自祖宗
以來條貫極多乞選差臣僚就審官三班院并
銓曹取索前後條例與主判官員同共看詳重
行刪定畫一聞奏付中書樞密院參酌進呈別
降勅命各令編成例策施行是時公意欲復古
勸學數言興學校本行實詔近臣議於是宋祈
王拱臣張方平歐陽脩曾公亮王洙孫甫劉湜
等合奏謹參考衆說擇其便於今者莫若使士
皆土著而教之於學校則學者脩飾矣先策論

則文辭者留心於治亂矣簡程式則閱博者得以騁矣問以太義則執經者不專於記誦矣乙亥詔州縣皆立學○五月壬戌朔公與韓琦並對於崇政殿上四策○六月十二日舉元積中管勾稅宜文字○七月丙戌詔諸路轉運使副提點刑獄察所部知州軍知縣縣令有治狀者以名聞議旌擢之其或不如所舉令御史臺劾奏並坐不實之罪從公奏請也十三日舉葛宗古楊麟充閣門祇候是月勘會河東邊上所關

弓弩并衣甲器械刀槍等自來從京支撥多是沿路損失枉費脚乘般載邊事不速二十七日公上言伏乞朝廷指揮下河東轉運司取要便出產炭鐵州軍置都作院舉差官員專監其人匠於本路諸州軍揀選抽差○八月辛卯命叅知政事賈昌朝領天下農田公領刑法事有利害其悉條上初四日吳賊差使臣一道姓金不得名往北界契丹處去不知事意公慮兩國計會與謀十五日奏乞那撥陝西兵三萬來赴江

東乞朝廷更不遷延十三日舉張子奭張燾張
去感蘇舜元陳榮古堪充刑獄錢穀重難任使
十五日舉夏安期充河東轉運使又舉向約乞
差知陝西河東煩難大郡十六日又舉張子奭
等五人赴河東任使初諸州軍縣每五年一造
城郭等第簿公體量得河東陝西自西事以來
甚有人戶因差配破却家產州縣不能矜恤減
放第候五年造簿方行定奪必是破盡家產多
為失所之人十八日奏言八月出榜曉示逐處

人戶并劄與逐州軍及都轉運司及三年便造
簿重定等第其因差配破落更不候三年便於
簿內注鑿減下其有即今淪落應役不得者即
與免放先是除宣撫韓琦到邊上散却特支後
至是已是一年不曾支付二十一日公奏臣今
往陝西河東宣撫其沿邊駐泊諸州軍及就戰
兵并人員兵士欲乞朝廷等第各賜特支○九
月公在并州見都轉運司指揮諸州軍場務更
不得收納大鐵錢要得止絕欺弊纔方行下文

字使有百姓經拜州告訴各市交易到大鐵錢
無處使用公遂出榜拜州街市且令依舊行用
據嵐州申本州九月一日支料錢并銀鞋錢二
百萬准運司上項指揮尋行告示其軍人例各
高聲言道官中支賜與我因何却不得行用其
轉運司牒本州更不敢施行公又恐諸處軍民
疑惑發下榜示逐處曉示軍民其官鑄大鐵錢
並依舊行使時河東諸軍州初新收刈白草降
下萬數不少逐處官吏不能體量利害例各差

兵士或探斫不前即便逃走公人等即出錢官
買或於人戶係稅草地內強行採打引惹爭競
即令逐處搔擾公出榜曉示諸軍州自榜到日
以前拋下兵士公人收刈白草數目並與放免
體量得逐處賊盜多是逃軍兼近南郊恐成群
黨驚劫人戶州縣不能禁止指揮河東州軍令
逐處出榜招召今日以前逃走廂禁軍人與限
一月許於官司首身更不問罪並令依舊收管
十六日西夏楊守素赴關公奏乞所有封冊之

禮須候西北收兵只行於體稍便乞朝廷再三
詳審二十日樞密院劄子奉旨令公就近差人
知麟州公與明鎬商量舉閣門祗候張繼勳是
月出榜曉示諸州軍應坊郭鄉村人戶今日已
前帶即配賣物色或包二稅移徙者並令與放
罪各令歸業其元欠二稅並與除免仍劄都轉
運司公到憲州體量憲州城池窄小奏乞增脩
○十月九日余靖奏乞劄付河東令彼處差人
佯作葺豐州所貴契丹不敢占據奉聖旨令公

相度公言豐州至河東一百二十餘里並無人
烟道路不通今來難便去管興脩初麟州無酒
務不權酒利寬假邊民自慶曆二年十二月權
起酒利公恐居民貧困出榜并劄與麟州令百
姓依舊任便開沽十日公到麟州體量二州四
面邊疆並無城寨防護人戶不敢復業遂與明
鎬商量申奏乞脩復城寨是月發遣散移往府
州與土田耕種十三日奏乞收贖麟府陷破蕃
界熟戶百姓依舊住坐耕作出得糧草方可却

減下正兵大段省得國家錢帛是月體量得火
山岢嵐保德軍三處各屯兵馬所入軍儲皆是
商旅人戶將銅錢接糶北界斛斗入倉中糶每
日計出却銅錢數百貫過往北界每歲計置河
東銅錢不日將盡此邊防之大弊也十九日奏
乞朝廷支絹五萬疋送下河東轉運司俵與岢
嵐等三處博糶軍儲急止銅錢出界之弊二十
七日張亢奏准經略司牒岢嵐軍等處有閑地
萬頃乞先於要路安置堡子兩三箇然後將上

件地土擘畫奉聖旨令公相度公恐置堡子代
州與北界相接引惹言語只令作社戶名目三
五十家靠險居住高築墻院防備盜賊○十一
月初五日知原州蔣偕狀申細腰城修築已完
須藉土兵守禦公劄與涇原路土兵充細腰城
就糧振武蕃落指揮○十二月經略司管勾何
涉有母在蜀中迎侍不得切於孝養初一日公
舉涉充益梓路通判以便奉親俾全孝道時蔣
偕出兵至佛空平燒蕩族帳种世衡領環州蕃

漢兵燒蕩大小羊族帳十四日奏乞酬獎諸將
功勞是月劄付陝府據諸縣逃官田地勒令地
分鄰人空納租錢者并見欠見錢數並與除放
劄付與河東轉運司將麟府等州色役公人支
與係官閑田仍免送二稅時契丹與元昊戰不
利奉聖旨指揮令公體探北界事宜公言自古
兵家每有挫衄恐其下離叛即別舉事圖賊復
振以攝衆心今契丹西征無功愧見其下或謀
起事欲振兵威此朝廷不可不防是月明鎬奏

募民請射禁地奉聖旨令公詳明鎬所奏相度
經久利害聞奏臣僚又奏焦太師來天池打量
事又奉聖旨令公計會相度穩審從長指揮又
奏相度到開耕禁地利害事十六日公自麟府
路回到岢嵐軍次日有鈐轄孟元并岢嵐軍使
米元湑來言有萬勝指揮兵顏和告稱有本指
揮軍人結集背叛司理院勘得本人不着次第
多次人債所告只聞人說並無照據欲領顏和
赴營處斬公尋指揮令與逐官更子細勘鞫實

情如委實誣告亦且決配况未曾刑害着被告
之人恐今後更不敢告事至十八日孟元等來
言審勘得別無實情更不敢枝蔓追究公又奏
訪問得萬勝指揮招到雜色人多有邊上已滿
三年其間輕狂之人不柰辛苦或亂出語扇搖
人衆於邊上不便乞蚤降指揮差替十九日奉
聖旨差入內供官衛克勤押賜醫藥至公處并
傳宣命公探候北界事宜及邊上設備者公言
見各訓練選奇兵備戰敵以分朝廷萬一之憂

二十日西賊點集壯人壯馬往環州界公劄經
略司起發軍馬赴乾興寨駐劄防托及令環元
州多方安撫前來蕃部蕃官二十三日奏言切
見太常博士趙拯秘書丞劉奕馮浩殿中丞范
寬之馬仲甫徐執中杜樞太子中允王復太子
中舍王孝和大理寺丞張謨並有才稱宜處要
務俾臨邊事可濟軍期伏乞望朝廷速差上件
官充陝西河東大郡通判貼黃自來兩府臣僚
無同罪舉官條例臣出使應所舉過官員恐朝

文正公集 卷之八
廷未賜施行如任用後犯正入已賊臣並行同罪

慶曆五年正月十四日奏撥細腰城屬環州二十七日河東轉運司申諸縣尚顯等陳狀為老小殘疾及年六十已上至七十年老除外別無人丁見今單身乞放免公劄下磁州疾速體量尚顯等如有人戶可以指射充替即依條貫施行如別無人戶指射即與免放施行○二月劄下并代等路經略司東都轉運司通行指揮逐處

疾速出榜曉示諸義勇軍習學弓弩是月翰林學士吳育為諫議大夫育初尹開封府時公在政府因白事數與公有迕既而公出安撫河東有奏請多為當國者所沮育取可行者固執行之○三月十八日西賊部領三千餘人打劫篳篥城等四月十四日公奏乞下部署司揀選得力將佐嚴行禁約至時與漢兵會免致疏虞○四月三日新邊壕外檉柵至葫蘆河一帶稱有西賊人馬約二萬餘人割寨及逐川內各有烟

火五里至七里蕃漢人戶一例驚移及差人探
問却稱來放牧牛羊其驚移蕃漢人戶尋却歸
復本處住坐公言昨往河西體問待鄜州路前
來被西賊破蕩之時其初西賊用謀亦是如此
其人戶為前來無事便各安心更不驚移遂遭
虜殺今來亦恐如打鄜州時設此計謀遂牒涇
原路經略司今後如得知西賊點集人馬即將
蕃漢人戶多差人起遣回避不得慢緩免致驅
虜初四日奏留蔣偕知原州新降宣命應係子

手兵士年及五十已上或疾病久遠不堪醫治
者許本戶人填替如本戶無人即許召人充替
施行公十七日奏言似此薦疾廢疾之類非可
詐偽者為年未五十已上有礙上項宣命諸處
不敢替放官中前來許顧人承替之時內有事
力之家即可雇人其下等第無錢顧人多是恐
脅家間骨肉令典賣莊田雇人深屬不便乞指
揮轉運司看驗如委實是薦疾廢疾之類並依
諸軍類更不問年甲便於揀停歸農不須要家

人并顧人充替又令疾苦之人各歸田園所以
不致失所○五月歐陽脩上疏伏見杜衍韓琦
范仲淹富弼等皆是陛下素委任之臣一旦相
繼而罷天下士皆素知其可用之賢而不聞其
可罷之罪陛下於千官百辟之中親選得此數
人一旦罷去而使群邪相賀於內四夷相賀於
外此臣所以為陛下惜也十五日奏乞指揮麟
府二州勘會歸業蕃漢人戶約量人口數目支
與貸糧乞更賜指揮與逐戶買牛具錢本選差

朝臣一員照管撫恤各令安歸復業○閏五月
涇原部署司所奏抽減年深上京東兵那官部
押赴近裏永興等處駐劄候今秋管押歸營次
奉聖旨令公相度公相度上件兵士已各年深
過滿又知別路並減那歸營秋間縱有事宜亦
難勾回邊上恐遞相扇搖別有言詞尋涇原路
差使臣管押歸營二十四日具狀申奏○六月
十四日奏諸軍頭失墜補署文帖免勒充長行
只於舊職名上降一等所貴兵級安心十七日

舉劉貽孫知鎮戎軍二十九日舉譚嘉震知德順軍時慶州東路巡檢竹昂公勤膽勇狄青許遷等皆推許此人可用舉昂充慶州駐泊都監○八月十三日聞朝廷差國子博士高良夫往延州計會夏國差人定立疆界又據高良夫申商量立界未定其西界楊守素回宥州取覆囊霄去公言夏國一面稱大段點集軍馬待與契丹相殺一面却與漢家爭些小疆界臣謂契丹元昊除是天亡時則有戰爭不顧利害如顧利

害則無戰爭之理或二蕃連謀窺伺中原則今後契丹先起事端候朝廷抽減陝西軍馬往河北然後元昊入寇則陝西四路皆可憂虞乞朝廷察此情狀不可信憑大為之備免致臨時敗事再錄與韓琦所上攻守策錄呈乞賜親覽是月與韓魏公奏舉李顯授門閤祇候二十三日禁秦州博易奏體量得秦州自來客旅收買川貨物帛等入蕃博易券馬入官中賣兼販蕃馬回訖百姓所買馬錢亦收買匹帛入蕃興販今

來若將秦州界西蕃博買一例止絕必是一路
蕃情怨望兼大段隔却興販券馬及阻節客旅
興販川貨則一路糧草少入中必是誤事伏
乞朝廷下秦州依舊降條貫施行二十九日舉
李顯充邠州都監○九月舉張肇知寧州公以
河西麟府田野空荒城市窮困使河東一路供
饋糧草錢帛未有休期若置一權務一則招誘
蕃部牛羊鞍馬行貨供河東一路官稅要用二
則麟府路收得客旅稅錢大段出得貨利就近

供軍三則止絕得私下與外界交易免犯令初
四日奏乞於麟州初置權場二十日西界送后
元孫歸漢配全州編管公言素不與元孫相識
亦不知本人善惡臣在延州但聞劉平后元孫
部領軍馬救護延州同戰拒賊日夜血戰兵少
食盡力屈被擒即不曾退走亦非不戰而降但
有不死於王事之罪又累該大赦却有救存延
州之勞縱不堪任用亦且免其戮辱少加存卹
當授一南班近下名目於近州安置使陷蕃將

校等聞之未絕向漢之心不怨朝廷不助夷狄
此禦戎之一策也○十一月十一日准樞密院
劄子節文臣僚劄子秦鳳路部署已下自来各
破親兵逐月支破添支錢乞今後所差親兵揀
選知武藝慣熟人數不得替換逐月更支破添
支錢候巡邊及駐劄出戰時即乞一例量支盤
纏錢三百文所貴均平免有虛破官錢奉聖旨
令陝西四路安撫司相度公相度若是揀却知
武藝慣熟人數久占在逐官手不得替換却恐

不切閱習因茲生疏有誤使喚已牒秦鳳路都
部署司據部署手親兵輪差替換依其餘路分
更不逐月支添支錢○十二月二十一日山外
德順軍界靖邊隆德寨壕外各有新招弓箭手
共八百餘人請射地土耕種修築堡子把截并
逐家老小在彼居住自来累遭虜掠公牒涇原
路安撫司各令將老小人口等般入壕裏居住
只量留少壯人在壕外堡子安泊防守管勾耕
種若遇大段賊馬難以禦捍亦須入壕裏回避

免枉遭虜掠

按舊年譜竄閩文應嶺南尋死于道此據富
鄭公所作墓誌按閩文應景祐二年十二月
辛亥落入內都知以昭宣使領嘉州防禦使
為泰州鈐轄後兩日改鄆州鈐轄百官表同
景祐四年四月乙丑文應徙潞州鈐轄百官
表同寶元二年九月癸卯文應卒此據百官
表贈邠州觀察使此據實錄未嘗有竄嶺南
指揮及死于道事迹不知鄭公何據也今姑

附錄

遺事

公丁母憂寓居南都晏丞相殊請掌府學公常宿
學中訓督有法度勤勞恭謹以身先之夜課諸生

讀書寢食皆立時刻往往潛至齋舍調之見有先
寢者詰之其人始云適疲倦暫就枕耳問未寢之
時觀何書其人妄對則取書問之不能對罰之出
題使諸生作賦必先自為之欲知其難易及所當
用意亦使學者準以為法由是四方從學者輻輳
宋人以文學有聲名於場屋朝廷者多其所教也
公在淄州長白山僧舍今醴泉寺讀書一夕見白鼠入
穴中探之乃銀一甕遂密掩覆後公貴顯寺僧修
造遣人欲求於公但以空書復之初僧快然失所

望及開緘使於某處取此藏僧如公言果得白銀
一甕今人往往談此事

公遣子堯夫到姑蘇般麥五百斛堯夫時尚少既
還舟次丹陽見石曼卿問寄此久何如曼卿曰兩
月矣三喪在淺土欲葬之而杜歸無可謀者堯夫
以所載舟麥付之單騎自長蘆捷徑而歸到家拜
起侍立久之文正曰東吳見故舊乎曰曼卿為三
喪未舉留滯丹陽時無郭元振莫可告者文正曰
何不以來舟與之堯夫曰已付之矣

公以朱氏長育有恩常思厚報之及貴用南郊所
加恩乞贈朱氏父太常博士暨朱氏諸兄弟皆公
為葬之歲別為饗祭朱氏子弟以公蔭得補官者
三人

公既貴常以儉約率家人且戒諸子曰吾貧時與
汝母養吾親汝母躬執爨而吾親甘旨未嘗克也
今而得厚祿欲以養親親不在矣汝母又已蚤世
吾所恨者忍令若曹享富貴之樂也

公子純仁娶婦將歸或傳婦以羅為帷幔公聞之
不悅曰羅綺豈帷幔之物耶吾家素清儉安得亂
吾家法敢持歸吾家當火於庭

公遇夜就寢即自計一日食飲奉養之費及所為
之事果自奉之費與所為之事相稱則鼾鼻熟寐
或不然則終夕不能安眠明日必求所以稱之者
公自政府出歸焚黃搜外庫惟有絹三千疋令掌
記錄親戚及閭里知舊自大及小散之皆盡曰宗
族親黨見我生長幼學壯仕為我助喜我何以報
之哉

公與南都朱某相善朱且病公視之謂公曰某嘗
遇異人得變水銀為白金術吾子幼不足傳今以
傳君遂以其方并藥贈公公不納強之乃受未嘗
啟封後其子宋長公教之義均子弟及宋登第乃
以所封藥并其術還之

公為人作銘文未嘗受遺後作范忠獻銘其子欲
以金帛謝拒之乃獻以所畜書畫公悉不收獨留
道德經而還戒之曰此先君所藏世之所寶其竊
以為宗家惜之母為人得也

公以晏元獻薦入館終身以門生事之後雖名位
相亞亦不敢少變慶曆末晏公守宛丘文正過南
陽道過特留歡飲數日其書題門狀猶稱門生將
別投詩云曾入黃扉陪國論却來絳帳受師資之
句聞者皆歎伏

公守饒州日有書生甚貧自言平生未嘗一飽時
盛行歐陽率更書薦福寺碑墨本直千錢為具紙
墨打千本使售于京師紙墨已具一夕雷擊碎其
碑時語曰有客打碑來薦福無人騎鶴上揚州東

坡作窮措大詩曰一夕雷轟薦福碑向使不擊碎
書生享用其有窮乎於此益知吉慶避者非吉慶
避之其福德淺薄自不能與吉慶會也讚曰淑慝
以類吉凶在人譬如儀鳳不棲棘荆虺蜴之窟豈
產珠玕冰雪凝沍寒谷不春一氣所感當識其因
韓魏公客有郭注者行年五十未有室家公以侍
兒與之未及門而注死

公為吏部員外郎出守時及官歷二府以至于薨
凡十年不增一人未嘗易也

公言幕府賓客可為己師者乃辟之雖朋友亦不
可辟蓋為我敬之為師則心懷尊奉每事取法於
我有益耳

公守越戶曹孫居中卒子幼家貧公助之俸錢百
緡治巨舟差老衙校送歸作一絕句戒其吏曰閔
津但以吾詩示之詩云十口相將泛巨川來時暖
熱去淒然關津若要知名姓定是孤兒寡婦船
公守邠州暇日帥僚屬登樓置酒未舉觴見衰絰
數人乃營理喪具者公亟令詢之乃寄居士人卒

於邠州將出殯近郊贈歛棺槨皆未具憮然即徹
宴席厚賙給之使畢其事坐客感歎有泣下者
公守杭州蘇麟為屬縣巡檢城中兵官徃徃獲薦
書獨麟在外邑未見收錄因公事入府獻詩曰近
水樓臺先得月向陽花木易逢春

公過淮境遇風賦詩云一棹危於葉傍觀亦損神
他時在平地無忽險中人雖弄翰戲語卒然而作
其濟險自得之心未嘗忘也

公守桐廬郡始建釣臺磯巖先生祠自為記以系
南豐李泰伯泰伯讀之三嘆起而言曰某妄意輒
改易一字公矍然扣之曰雲山江水之語於義甚
大於詞甚博而德字承之乃似碌碌擬換作風字
如何公疑坐頷首殆欲下拜

公守饒州創慶朔堂既去以詩寄魏介曰慶朔堂
前花自栽便移官去未曾開年年長有別離恨只
托春風管幹來舊州治有石刻

公與韓魏公為經畧安撫招討副使約公進兵公
曰當自謹守以觀其變未可輕兵深入尹洙歎曰

公於此乃不及韓公也韓公嘗云大凡用兵當先
置勝敗於度外今公乃區區過慎此所以不及韓
公也公曰大軍一動萬命所懸而乃置於度外淹
未見其可魏公舉兵入界次好水以全師陷沒魏
公遽還至半途陣亡父兄妻子數千人號於馬首
皆持故衣紙錢招魂哭曰汝昔從招討出征今招
討歸而汝死汝魂識能從招討歸乎哀慟聲動天
地魏公悲憤掩泣駐馬不能前者數刻公聞而歎
曰當是時難置勝敗於度外也

公尹京日有內侍怙勢作威傾動中外公抗疏列
其罪疏上家所藏書有言兵者悉焚之仍戒其子
曰我上疏言斥君側小人必得罪以死我既死汝
輩勿復仕宦但於墳側教授為業疏奏嘉納其言
罷黜內侍

公知慶州兼經略招討使未幾賊兵三萬叩城公
麾兵血戰賊奔西北遂戒諸將無追奔既而果有
伏兵又奪為大順城久之世衡不利於定川公晝
夜為領兵援初關輔人心搖動及見公耀兵號令

嚴兵威震戎落人心遂安相賀曰邊上自有龍圖
公為長城吾屬何憂

公與呂申公論人物申公曰吾見人多矣無有節
行者公曰天下固有人但相公不知耳若以此意
待天下士宜乎節行者之不至也

公言息盜賊誅奸雄浩然無憂乃所以為身謀若
未能如是雖州里不可保七尺之軀無所容於天
地之間矣

某公在慶曆中議弛茶鹽之禁及減商稅公以為
不可茶鹽商稅之入但分減商賈之利耳行之商
賈未甚有害也今國用未減歲入不可闕既不取
於山澤及商賈須取之於農與其害農孰若取之
於商賈今為計莫若先省國用有餘當先寬賦役
然後及商賈弛禁非所當先也其議遂寢

公為叅知政事日兗州守梁適乞以廂兵代廂戶
又裁減人數是時章得象為宰相執政欲從梁適
之請獨公云此事與尋常利害不同而此人可減
吾輩雖行他人必復之尋有中書劄子令差足人

數當時天下無賢不肖莫不稱之

公為參知政事日歐陽脩余靖蔡襄王素為諫官時謂之四諫四人力引石介執政從之公獨曰介剛正天下所聞然性亦好異使為諫官必以難行之事責人君必行少拂其意則引裾折檻叩頭流血無所不為主上富春秋無失德朝廷政事亦自脩舉安用如此諫官也諸公服其言而罷

公與韓魏公富彥國慶曆中同在西府上前爭事議論各別下殿各不失和氣如未嘗爭也當時相善三人如推車子蓋其心主於車可行而已不為已也

慶曆初上厭西兵之久出而民弊亟用公與富鄭公韓魏公而三人者遂欲盡革衆事以脩紀綱而小人權倖皆不悅獨公與相佐佑而公尤抑絕僥倖凡內降與恩澤者一切不與每積至十數則連封而面還之或詰責其人至慚恨涕泣而去上嘗諭諫官歐陽脩曰外人知杜衍封還內降耶吾居禁中有求恩澤者每以杜衍不可告之而止者多

於所封還也其助我多矣此外人及杜衍皆不知也然公與三人者卒皆以此罷去

公與相國韓公為西帥狄武襄青隸其節下為人器度深遠咸竒之曰此國器也公嘗以左氏春秋授狄武襄曰熟此可以斷大事將不知古今乃匹夫之勇青於是晚節益喜書史既明見時事成敗尤好節義

公與韓公杜公多知本朝故實善決大事初邊將議欲大舉以擊夏人雖韓公亦以為可舉公爭以為不可大臣至有欲以沮軍事罪公然兵後果不得出契丹與夏人爭銀瓮族大戰黃河外而鴈門麟府皆警杜公安撫河東欲以兵從公以為契丹必不來兵不可妄出公怒以語侵公公不為恨後契丹卒不來二公皆世俗指公朋黨者其論議之際蓋如此及三人者將罷去公獨以為不可遂亦罷

公知開封府獻百官圖指宰相差除不公而陰薦韓忠獻公億可用文正既貶仁宗以諭公公曰若

仲淹舉臣以公則臣之拙直陛下所知舉臣以私
則臣委質以來未嘗交托於人遂除叅知政事
公與韓琦自陝而來朝石守道作慶曆聖德詩忠
邪太明白道中得之公撫股謂韓公曰為此恠鬼
輩壞之也韓公曰天下事不可如此必壞其後果
然

公慶曆中與富弼韓琦杜衍章得象賈昌朝晏殊
同時執政呂夷簡罷相夏竦罷樞密使歐陽脩余
靖王素蔡襄並為諫官祖徠先生喜曰此盛事也

歌頌吾職其可已乎乃作慶曆聖德詩其畧曰衆
賢之進如茅斯拔大姦之去如距斯脫衆賢謂衍
等大奸斥竦也詩且出泰山先生見之曰子禍始
於此矣先生不自安求出通判濮州

吳遵路丁母喪廬墓側蔬食終制既歿家無長物
公分俸調其家

錢尚書適為洪州職官緣事過鄱陽見彭器資值
月朔有衣冠數十輩來見彭公設拜各人進問起
居而退錢在書齋中窺見甚訝之因問公此輩何

人公巨皆鄉里後進子弟也錢曰今他處後進必
居於位或與先生並行何以有此彭公曰昔范希
文自京尹謫守是邦其為政以名教厚風俗敦尚
風義
為先州人仰慕
咸頌嚮之遂以成俗凡先後輩以父兄子弟自任
而不敢忽父之不變也此大賢臨政之勅可以為
法

公知慶州日有人以碑銘托公者公為譏述黃緣
及一貴人陰事一夜夢貴人告曰某此事實有之
然未有人知者今因公之文暴露矣願公易之公

夢中謝曰隱公此事則某人當受惡名公實有此
我非誣人者不可改也貴人即以語公曰公若不
改當奪公子公曰死生命也未幾次子純仁病既
而又夢貴人曰公子我豈能奪今告公為我改之
公子安矣卒不改公之剛正是可見也

公為江淮體量安撫所至賑乏絕又陳八事其四
曰國家重兵悉在京師而軍食仰於度支則所養
之兵不可不精也禁軍代回五十以上不任披帶
者降於畿內及陳許等處近下禁軍一卒之費歲

文正公集 卷之八 進事
不下百千萬人則百萬緡矣至七十歲乃放停且
人方五十之時或有鄉園骨肉懷土之情猶樂舊
里及七十後鄉園改易骨肉淪謝羸老者歸復何
托是未停之前大蠹國計廢之之後復傷物情咸
平中棟鄉兵人無歸望號怨之聲動於四野祥符
中選退冗兵無歸之人大至失所此近事之鑒也
請下殿前軍馬司禁軍選不堪披帶者與本鄉州
軍別立就糧指揮至彼有田園骨肉者許之歸農
則羸老之人亦不至失所矣

神文時慶曆淮南有王倫者嘯聚其黨頗擾郡縣
承平日久守令或有棄城而出者請論如法公叅
預大政爭以為不可今淮南郡縣徒有名耳其城
壁非如邊塞難責城守神文睿哲寬仁故棄城者
得以減死論既退鄭公忽謂文正公曰六丈當欲
作佛耶范公曰主上富於春秋吾輩輔導當以德
若使人主輕於殺人則吾輩亦不得容矣鄭公歎
服

公用人多取氣節闊畧細故如孫威敏滕達道之

徒皆深所厚者為帥府辟置多謫籍未牽叙人或
以問公公曰人之有材能無瑕類者自應用於宰
相惟實有可用不幸陷於過失者不因事起之則
遂為廢人世咸多公此意凡軍伍以雜犯降黜者
皆改刺龍騎軍石林燕語

韓魏公章得象在中書時方天下多弊事且有西
鄙之患每與希文彥國以文字至兩府章公輒閉
目不答彥國憤惋欲悖之希文惜大體不許也魏公

錄別

公常言史稱諸葛亮能用度外人用人者莫不欲
盡天下之材常患近已之好惡而自不知也能用

度外人然後能周大事

沈括筆談

公與韓魏公召為樞密副使天下聞之士大夫皆
酌酒相賀曰上用韓琦范淹仲淹非惟社稷幸乃天下
生民之幸

公知開封府明敏通決照事若神每上殿奏事多

陳治亂以開人主歷詆大臣不法者

長編

慶曆二年仁宗以涇原傷夷欲令范滂與文潞公

對易遣內侍王懷德喻旨公謝曰涇原地重臣恐
不足以獨當願與韓琦同經畧涇原並駐涇州琦
兼秦鳳臣兼環慶一則夷夏相安事不亟易二則
涇原有警臣與韓琦可合秦鳳環慶之兵犄角而
進若秦鳳環慶有警亦可以率涇原之師以相應
援三則通脩環州鎮戎諸砦藉此兩路事力必能
速有成功四則臣與韓琦日夜建議選練兵士漸
復橫山以斷賊辭不數年間可期平定願詔龐籍
兼領環慶以成首尾之勢秦州委文彥博慶州用

滕宗諒總之孫沔亦可辦集渭州一武臣足矣朝

廷皆從其請

實錄

公言沿邊逐寨雖有險固只有三二百人何以施
為又城池中多無井水若不量事勢但令堅守徒
陷一城軍民性命自挫軍威無益邊事其在環慶
路相度二十三寨內有美泥虐泥大板城等小砦
但只量兵士差百十人把截道路如探得賊馬大
段入寇便令歸側近大城砦內一處防守所貴不
致枉陷軍民人心遂安

奏議

慶曆二年南郊赦書應因公事受到諸處行軍司馬副使司士文學參軍仰逐處并具到任月日負犯因依分析聞奏候到令刑部子細勘會元犯因依申奏委中書門下別取進止者公因奏言懷才抱藝之人一落散地終身不齒獸窮則變人窮則詐古人之所慎也况今邊事未寧尤宜使過欲乞朝廷催促逐處依赦文分析聞奏乞差近上臣寮就中書定奪元犯情理分作等第又委長吏密切體量上件人或有人材質或有節行亦具中奏所貴

負犯之人各期自新不懷幽憤唐張說薦負犯之人充將帥之用其表云活人於死者必舍生而報恩榮人於辱者必盡節而雪恥古猶今也乞朝廷

留意

實錄

元昊寇鎮戎軍葛懷敏入保定川岩涇原鈐轄曹英又敗於砦之東北隅懷敏所部人奔駭懷敏為衆所擁幾蹂踐死興至瓮城乃蘇賊遂圍城懷敏與諸將謀赴鎮戎軍賊斷其歸路與諸將皆遇害賊遂長驅至渭州初懷敏之除鄜延也范仲淹言

其不知兵而又怯懦不可用遂徙涇原卒敗事

東都

事畧

張亢築清塞百勝中候建寧鎮川五砦而麟府之路始通亢復奏以所通特一逕請更築并邊諸柵以安河外議未下會契丹渝盟徙知瀛州遷果州團練使夏人與契丹戰河外范公宣撫河東因奏使亢知代州就令摠前議增築事不閱月諸砦成蕃漢歸者數千戶歲減戍卒萬人

張亢本傳

公薦舉處士有徐復履尚高潔衍卦氣之法公過

潤州問復以衍卦占之今夷無動乎復為占西邊用兵日月無少差又有郭京者好言兵公數薦之

由是二人同名

東都事畧

張俞上言謂今能詭制北虜散其陰謀使與叛醜疑貳有結國家之心間誘西涼群夷勿與賊結則虜首可得而天下定矣范仲淹以諫爭而遭擯斥若外徇物望內惟邦本宜委重柄而授之苟能行此是謂失之東隅收之桑榆也呂夷簡甚重其言

張俞傳

宋史

卷

七

公以西賊攻塞門若其寨城池未備兵甲又少部
署司不與救應若主高延德為賊所擒後放歸漢
界遂配遠方公言漢家將率有數人陷在賊庭俱
是苦戰力屈為賊所擒即非背叛如朝廷貸高延
德被以寬恩仍與近邊任使使陷蕃將率聞之必
願吳賊歸順望再見其家或即懷本朝之恩不助
賊計如朝廷責其不死來者遠竄其陷蕃將率更
無歸路必懷怨望其中或有助賊為孽其患不細
昔漢中行說傳公主入匈奴說不欲行怨漢乃教

單于大為漢患此人情之可見也乞朝廷留意

康定元年九月辛未公以任福等出師攻賊白豹
城破之冬十一月又出師出歸娘谷與夏人戰大
敗之

西夏本末

公以孫明復居泰山之陽著春秋尊王發微得經
之本義為多學者皆以弟子事之公言其道德經
術宜在朝廷召拜國子監直講

東都事畧

韓魏公與公在兵間最久名重一時人心歸之朝
廷倚以為重故天下稱為韓范初京師歲遣戍兵

脆懦不習勞苦賊常輕之目曰東軍而土兵勁悍善戰琦奏增土兵以抗賊而稍減屯戍內實京師又以籠竿城據衝要乞建為德順軍以蔽蕭關鳴沙之道又建請於鄜延渭三州各以土兵三萬為一軍軍雖別屯而耳目相通為一視虜所不備互出擯之破其和市屠其種落因以招橫山之人度橫山隳則平夏兵素弱必不能支我下視興靈穴中兔耳章既上遂與范公定謀益堅而元昊知不可敵歛兵不敢近塞矣

東都事畧

好水川之失利韓魏公降知秦州公亦以擅答元昊書降知耀州王堯臣言此兩人天下之選其忠義智勇名動夷狄不宜以小故置之明年葛懷敏敗涇邠以東皆閉壘自守公自將慶州兵捍賊賊始引去仁宗思其言乃以魏公與公為招討使堯臣曰陛下復用韓琦范淹仲淹幸甚然將不中御兵法也願許以便宜從事仁宗以為然從之九朝通畧仁宗嘗語張士遜曰人言仲淹嘗欲乞廢朕朕但未見其章疏耳士遜曰陛下既未見其章疏不可

以空言加罪望陛下訪之積十數請仁宗曰竟未
之見也然為朕言之多矣士遜力為辨其不然仁
宗意乃解其後士遜歸老啟國于鄧范公適守鄧
州士遜還鄉范公置酒高會明日士遜復置會揮
金甚盛時人榮之

張鄧公傳

韓魏公曰呂申公以進賢自任恩歸於已時士皆
出其門獨范公歐公尹公旋收旋失之終不受其

籠絡也

魏公別錄

原州屬羌明珠滅滅二族兵數萬與元昊隔絕隣

道公聞涇原欲襲討之公奏言二族道險不可攻
前日高繼嵩已嘗喪師平時猶懷反側今討之必
與賊為表裏南入原州西擾鎮戎東侵環州邊患
未艾也宜因元昊別路大入之際即并兵北取細
腰蘆泉為堡鄣以斷賊路則二族自安矣而環州
鎮戎等處徑道通徹可以忘憂矣後二歲遂築細
腰葫蘆諸砦屬羌歸服

長編

慶曆五年三月歐陽公上疏言公與杜公富公不
當罷其畧曰昔年范仲淹初以忠言讜論聞於中

外天下賢士爭相稱慕當時奸臣誣以朋黨尤難
辯明近日陛下擢此數人並在兩府察其臨事可
以辨也此四人者可謂公正之賢今范仲淹四路
之任亦不輕矣願陛下拒絕群謗委信不疑使盡
其所為猶有裨補

長編

慶曆四年八月辛卯初命叅政賈昌朝領天下農
田范仲淹領刑法事有利害其悉條上初公建議
請以三司司農審官流內銓三班院國子監太常
刑院審刑大理群牧殿前馬步軍司各委輔臣兼

判臣願自領兵賦之職如其無補請先黜降章得
象等皆以為不可久之乃降是命

九朝通畧

慶曆元年春正月朝廷既用韓琦所畫攻策先戒
師期知延州范仲淹言正月內起兵塞外雨雪大
寒暴露僵仆使賊乘之所傷必衆賊界春暖則馬
瘦人飢其勢易制及可擾其耕種之務縱出師無
大獲亦不至有他虞又言廊廡是舊日進貢之路
蕃漢之人頗相接近願朝廷存此一路令諸將勒
兵嚴備賊至則擊未行討伐容臣示以恩信歲時

之間或可招納苟歲月無效遂舉重兵取綏宥二
州擇其要害而據之屯兵營田作持久之計如此
則茶山橫山蕃漢人戶可以招降則是去西賊之
一辭也戊午詔從仲淹所請宋朝通鑑
公在延州言廊延路入界壯諸路最遠若先脩復
城寨即是遠圖乞遣使命令臣督諸將出兵先脩
復廢砦別置戍守既通近蕃界彼或點集人馬朝
夕便知大至則閉壘以待隙小至則扼險以制勝
公前後凡六奏卒城永平等十二寨蕃漢之民相

踵復業

宋朝通鑑

慶曆間江淮歲漕不給京師乏軍儲樞密副使范
仲淹言國子博士許元可獨倚辦遂擢元淮江兩
浙荊湖制置發運判官元曰以六路七十二州之
粟不能足京師吾不信也至則命瀕江州縣留三
月糧悉發之遠近以次相補引千餘艘轉漕而西
未幾京師足食長編

諫官歐陽脩言韓琦范仲淹久在陝西備請邊事
是朝廷親信委任之人况二臣材識不類常人其

所見所言之事不同常式言事者陛下最宜加意
訪問使其盡陳西邊事宜合如何處置余靖亦奏
言范仲淹號為最曉邊事

實錄

給事中叅知政事王舉正為禮部侍郎知許州初
諫官歐陽脩余靖蔡襄咸言范仲淹有宰輔材不
宜局在兵府願以仲淹代之上從其請遂以范仲
淹為叅知政事仲淹曰執政可由諫官而得乎固
辭不拜

公在陝西戒約諸寨若是賊馬大段入來更不得
出兵迎賊鬪敵但且堅守一面供報部署司并策
應官員候逐處軍馬來方得設謀掩殺如輕易
出兵致有輸折其本處官員並行軍法既而准樞
密院劄子若賊寇深入應外城若除留定防守城
池外並須領兵先據險要覓便攻擊如敢以防守
為名端坐不出具狀申奏乞行軍法奉聖旨依奏
公言自古用兵本無常勢非可畫一而制也相度
本路諸砦之兵多者千人少者五七百人或三二
百人只令防守城池尚慮不足若有蕃賊入寇其

寨主監押等縱有勇敢徃徃見小利便出兵與之
追逐如西賊以羸兵誘致離砦稍遠別出精兵斷
其歸路砦中無兵即見危陷假有一將在外去州
或遠應援未至如遇賊衆大至多選精銳并攻一
處謂之奪險非有驍將血戰勢不能支若外兵先
敗則州城之兵望風挫氣必難為用臣謂應變之
機拘以條貫非其利也其所降指揮不敢行下奏議
西賊寇鎮戎軍官軍不利公牒知原州景泰等令
六頭項下軍馬會合相度揀選精兵三二千人夜

擊蕃砦探候山外賊馬迴時即多出奇兵夜間或
侵曉伏截衝擊收救人民仍戒約不得脫剝被虜
人戶人物公又恐諸將貪功一向急去追襲被西
賊設伏兵更落姦便又牒景泰等火急多差人搜
山探候如探得西賊先有伏兵即便就高駐劄別
選敢死之士多作頭項先去掩擊只以收救人民
不得貪小功小利再有踈虞以副朝廷之意公又
到邠州畧示兵勢又出榜永興軍諸州以安關中
人心奏議

陝西新刺保捷兵士多將本家贍軍田土并已分物業典賣破貨公言上件兵士並是鄉民若向去稍似年高披帶不得即須揀放歸農如今來破貨了莊產將來無可歸投便見失所遂出遍榜曉示諸州軍應新刺保捷兵士如今後乞將本家贍軍田土已分物業典賣破貨者不得施行其典賣人嚴行斷遣如將來殘患不堪征役及有年高不任披帶放令歸農者即給與已分莊田養種并劄與逐處令指揮諸縣依此出榜常切覺察施行奏議

皇祐元年春上御便殿訪近臣以備禦之策權三司使葉清臣對曰今輔翊之臣抱忠義之深者莫如富弼為社稷之固者莫如范仲淹又曰諳古今故事者莫如夏竦議論之敏者莫如鄭戩方面人才方重有紀律者莫如韓琦臨大事能斷者莫如田况剛果無顧避者莫如劉渙宏遠有方畧者莫如孫沔至於帥領偏裨貴能坐運籌策不必親當矢石王德用素有威名范仲淹素練軍政龐籍久經邊任皆其選也長編

公知開封府每進見輒論時政得失宰相呂夷簡惡之斥守饒州諫官高若訥詆誚公與歐陽脩為黨歐陽公以書責若訥謂其不復知人間有羞耻事若訥以聞謫夷陵令徙軋德復為武成軍節度判官公帥陝西辟脩掌書記脩曰吾論范公豈以為利哉同其退不同其進可也辭不就

張昇改轉運使知鄧州昇以親老辭或以為避事

范仲淹曰張昇非避事者乃聽侍養

通鑑

富彥國幼薦學有大度范公見而識之曰此王佐

才也懷其文以示王曾晏殊即以女妻之

談藪

河東轉運司指揮諸州軍場務更不得收納大鐵錢為民間漸多私鑄要得止絕欺弊遂有百姓經并州告訴各是交易到大鐵錢無處使用公遂出榜并州街市且令依舊行用公又恐諸處軍民疑惑各已入急遞發下榜示逐處曉示軍民其官鑄大錢並依舊行使諸場務亦仍舊行用鐵錢

麟州元無酒務至慶曆二年十二月官中初置酒務後據百姓劉遷狀申公勘會麟州元管三縣六

番落蕃漢戶二千五百餘家朝廷以河東極邊不
榷酒利今來殘破之後四面並無居民入城交易
只有城中主客二百餘戶別無經營從去年十二
月官自開沽在市居民更無營利之地今算出官
本并官員兵士請受外只有淨利二百餘貫兼城
中居民逐旋離去久遠不成州郡遂出榜并劄與
麟州指揮本務據見在酒貨賣盡日儘行醞造令
百姓依舊任便開沽

陝西側峻瘠薄迤田地土自來勒地分隣人分認
空納租錢人戶不願送納陝府申乞除放公劄與
陝府據諸縣迤田官地勒地分隣人空納租錢者
并見欠錢數并與除放今後不得抱認送納

慶曆四年十二月上差入內供奉官衛克勤押賜
醫藥至公處并傳暫發入探候北界事宜公上言
見各訓練選奇兵准候敵事惟難得經歷將帥如
壯戎兵馬未放散間肅整飭使離河東北邊或有
緩急與明鎬商量指揮諭往驅敵使人庶幾分朝
廷萬一之憂公言諸軍頭等給文帖宋舊勅文應

有軍頭等補署文帖誤被水火損壞或賊人偷盜者許申本管人員勘會詣實給與公據如自失墜即勒充長行者公言軍頭失了文帖降充長行其中甚有能部轄勾當人因累次功勞方得遷補被手下軍士憎嫌多方窺竄藏毀文帖便降充長行情實可憫以此苟且和同不敢鈐轄覺察手下兵士違犯作過成弊愈深乞朝廷特降宣命指揮今後失去補署文帖有因故事失去勘驗不虛即依舊職名重給公據收掌別無因依稱去失者如勘會得委不因酒醉及不是典解錢物即於舊錢數內降一等別給文帖安排所貴兵級安心無致誤犯

公禁義軍承接樞密院劄子與安撫司行移都部署司依准朝旨施行仍指揮本路州軍縣鎮出榜及鄉村粉壁曉示人戶嚴行覺察如替名人及諸色人等起動搔擾即收捉赴官勘斷施行

公言天下郡邑事朝廷從之降勅署琦仲淹等奏請公又言若署臣等奏請於理未便只乞作朝廷

憂勞之意特選臣僚舉官則事體甚重也

通鑑

慶曆四年六月己丑省河南府潁陽壽安偃師緱氏河清五縣並為鎮逐鎮令轉運司舉幕職州縣官兩員監酒稅仍管勾煙火公事又析王屋縣隸河南府始因叅政范仲淹之請也

類苑

康定元年春正月丙子經畧安撫判官尹洙至延州與范仲淹謀出兵越三日仲淹徐言已得旨聽兵勿出洙留延州幾兩旬仲淹堅持不可辛丑洙還至慶州乃知任福等敗績

長編

慶曆四年七月丙戌詔諸路轉運使副提點刑獄察所部知軍知縣有治狀者以名聞議旌擢之或不如所舉御史劾奏並坐上書不實之罪從叅政

范仲淹奏請也

類苑

公奏言西人請和有不可許者三有大可防者三又言臣等已議於一二年間訓兵三四萬使號令齊一陣伍精熟我軍鼓行山界每歲三五出元昊諸廂之兵頻來應敵疲於奔命則山界蕃部勢窮援弱自求內附足以斷元昊之手足矣臣等早蒙

聖獎擢與清班西事以來三年塞下日勞月憂豈
不願少圖休息非樂職矢石之間蓋見西戎強梗
未衰挾以變詐臣等是以不敢念身世之安忘國
家之憂須罄芻蕘少期補助其元昊來人到闕伏
望聖慈於納和禦侮之間慎於處置為聖朝長久
之慮則天下幸甚

實錄

公牒逐州相度新兵未有營房欲配買木植則大
費官錢兼搔擾人戶又卒難了當其自來等第戶
各有莊園宅舍及將家入營僅得一間營房難為

存濟新兵內貧窮之家即給與係官木植其稍有
家力情願自於本家般到材植要蓋舍屋者聽如
中等已下苦無事力除自有舊材料情願將來蓋
造外或買到新瓦木者估價給與解鹽交引大省
官錢又逐家自蓋屋宇早得了當并等第之家乍
住營房不致迫窄可以存濟

公累奏薦种世衡知環州未用又上言環州勾當
一郡十三寨當此危地須在得人朝廷以臣不才
而輕此一路臣恐將有麟府之禍雖加罪於臣無

益邊事臣今乞將新授左司郎中一官迴授种世衡轉諸司使知環州權鈐轄司或朝廷從臣所請使邊臣知推讓之風亦非細事如終不允從則乞差臣帶本路一將軍馬權知環州支備如朝廷體量臣稍涉虛妄甘受上書詐妄不實之罪又奏云臣前乞將一官保舉本人非欲鼓激蓋為環州可憂後朝廷竟從公請果得世衡之用

於議及長編

公出巡邊至環州點檢環州管界熟戶蕃官共一千七十二人與酒食管設作聖恩等第支與綵絹角茶銀碗紫綾襖黃花襖銀腰帶銀裹頭杖帽子旗槍銀交椅紅纓紫綾袋全錦襖子等物重立約束四件對衆告諭尋令蕃部望闕謝恩率皆喜躍

名臣傳

公言禁青鹽欲以困西賊非困賊之要却有所害會淮安砦捉到買青鹽兵士二人勘得本指揮火隊掠錢買鹽入衆喫用公言竊見諸軍常令聾樂蓋欲悅其衆心不至愁苦今兵士處於窮邊冒矢石負星霜若飲食失所更禁絕鹽味何以聊生未

能困賊先困我師其買鹽兵士是本部衆人之罪
實不敢盡法恐傷士心只決二人杖二十押送本
部仍奏朝廷乞更參詳青鹽條貫名臣事實

河東諸處坊郭村鄉人戶甚有差配頻併貧困祇
當等第不得各拋下產業逃移在外大段失所公
出榜曉諭諸州軍應坊郭村鄉人戶今日以前帶
却配賣物色或抱二稅逃移者並令與放罪各令
歸業其元拋下產業不得納官疾速差能幹官吏
比附見在人戶物產定奪合該減放等第招誘歸
業者不得更依元本等第其元次二稅並與放除
仍劄與都轉運司施行

陝府有稅戶朱士成等八百九戶各為送納秋稅
不前全家逃走延州延長等七縣逃移却稅戶三
百七十一戶公牒陝府逐縣鄉村拘管上件逃移
人戶屋業桑產不得燒毀斫伐其逃走人戶權與
倚閣去年秋稅其見在第五等秋稅只於本處送
納其第四等戶亦於隣州送納免致逃移毀却桑
產將來歸業不得所有諸州軍人戶慮恐亦有似

此逃移并牒逐州亦請相度安恤類苑
任福破白豹寨捉虜到偽首領李家妹在慶州官
員充奴婢公恐蕃界首領聞及轉生怨毒別起奸
弊遂差指使侍禁石斌往慶州取同延州通判馬
端及本路都監朱青問得所說事文狀一紙及稱
於慶州淮安鎮有投來軍是親叔公即差石斌押
送慶州分付與親叔歲奴收管令嫁土人為妻後
石斌回稱到彼歲奴骨肉並來覷當號哭
延州東路青澗城承平砦并保安軍北巡檢劉化

基手下熟戶蕃部遭西賊打虜驚移傷殘戶數并
投來蕃部並在逐寨及本軍側近住坐未曾歸業
公慮恐其失所却逃入蕃界遂牒种世衡等勘會
驚移熟戶蕃部有未敢歸業即便相度隣近官私
空閑地土權撥與耕種如無牛具者官與量借糧
收買又勘會驚移人戶并投來蕃部其中甚有缺
乏糧食存濟不得却恐致有逃走又牒种世衡相
度逐戶口數目每十口已上量支借貸祿粟各一
石十口已下支借五斗嘗切照管安撫無令失所

又金明砦蕃戶三百二十八戶雖給與田土緣經
討虜後無力耕耘公又牒延州通判高延夫將蕃
部每家十口已下各支斛斗二石十口以上支三
石並令於本處砦倉支給西夏本末
公常言官人之法人主當知其遲速升降之序其
進退近臣不宜全委宰相實錄

康定二年五月十四日中書省劄子陝西軍州如
有因修展城郭倉庫草場營房等但係侵占人戶
地土去處並令將係官空閑地許人戶請願指射

官司給還若無地土即取索本主元買契比類隣
近地段買置價例支還本錢公到邠州據人戶王
昭瑋等陳狀稱官中修營占却園地拆了屋舍乞
估計合支價錢公體問得邠州稱遠城側近並無
空閑官地給還公遂委安平知縣李仲昌訪地所
估到王昭瑋等合支價錢牒邠州請依上項條貫
支給逐人價錢去訖又據後邠州申准轉運司牒
修營占却人戶地基却令兌換係官空閑地土撥
還却勾收已支價錢赴軍資庫送納公言諸州自

來脩造營房只是踏逐官地不許毀人戶見宅邸
舍物業其邠州便將人戶見住物業毀拆逐起人
戶無處存活既無官地允還即合給還價錢買屋
當司支與錢物其人戶當已破費雖准轉運司指
揮今將空閑官地允還既無官地即合回申轉運
司豈得便却例行催納已支價錢侵害人戶遂勾
到本州元行典級王益等勘杖一百斷遣所有人
戶地土價錢牒邠州依條支還

名臣事實

公體量河東州軍人戶近年徭役科配頻併例各

貧困遂免放今年秋稅稍得休息又恐陝西州軍
人戶亦自兵興以來祇應差科不易尋劄與陝西

轉運司依河東例減放人戶支移

奏議

麟府州岢嵐軍極邊之地人戶稀少其色役公人
並差主戶客戶祇應輪差出入應副軍期多致賠
備破却家產又邊人日見貧困祇應不前公劄與
轉運司并府州岢嵐軍據見今衙前使院人吏並
仰依鎮戎軍條例支撥與係官荒閑田土仍免送
納二稅租課

名臣事實

西夏曩宵之叛其謀皆出於華州士人張元與吳
昊而其事本末國史不書比得田畫承君集實紀
其事云張元吳昊姚嗣宗皆關中人負氣倜儻有
縱橫才相與友善嘗薄遊塞上觀視山川風俗有
經畧西鄙意姚題詩崆峒山寺壁在兩界間云南
粵干戈未息肩五原金鼓又轟天崆峒山叟笑無
語飽聽松聲春晝眠公巡邊見之大驚又有踏破
賀蘭石掃清西海塵之句張為鸚鵡詩卒章曰好
著金籠收拾取莫教飛去別人家吳亦有詩將謁

韓范二帥耻自屈不肯往乃礮大石刻詩其上使
壯夫棧之於通衢三人從而哭之欲以鼓動二帥
既而果召與相見躊躇未用間張吳徑走西夏公
以急騎追之不及乃表姚入幕府張吳既至夏國
夏人倚為謀主以抗朝廷連兵十餘年西方至為
疲敝職此二人為之時二人家屬羈縻隨州間使
諜者矯中國詔釋之人未有知者後乃聞西人臨
境作樂迎此二家而去自此邊帥始待士矣姚又
有述懷詩曰大開雙白眼只見一青天張有雪詩

曰五丁仗劍決雲霓直取銀河下帝畿戰死玉龍
三十萬敗鱗風卷滿天飛吳詩獨不傳觀此數聯
可想見其人非池中物也

容齋三筆

延州都監周美言于范公曰賊新得志其勢必復
來金明當邊衝我之蔽也今不亟完將遂失之公
因屬美復城如故數日賊果來其衆數萬薄金明
陣于延州城北三十里美領衆二千力戰會暮援
兵不至乃徙軍山北多設疑兵賊望見以為救至
即引去既而賊出艾蒿若遂至郭北平夜鬪不解

美悉衆使人持一炬從間道上山益張旗幟四面

大譟賊懼走獲牛羊馬橐駝鎧甲數千計遂募兵

守其地

東都事畧

嵐石都巡檢司接應到西界蕃部散移團練使十
三戶奉勅於海州住坐散移願殺其妻子自刎死
公差人往石州勾喚到散移問當深不願海州居
住公言散移歸投新來其心未安若必遣住海州
安泊不惟遠去鄉土全失蕃情又其人不測朝廷
意旨却自刑害今來西事未寧邊上蕃部聞之絕

其向化之意則皆為怨敵邊害愈深遂發遣散移
往府州與田土耕種準備緩急使喚及令招喚本
族未來蕃部

公節制諸將勘會自來漢家兵馬先出只排作一
陣被賊奔衝便見輸折遂牒東路朱吉任守信等
候賊奔衝未得出兵但堅守城池放令深入即計
會多著頭項衝突掩殺不得先出軍馬只作一陣
排布依然無功如是被賊守門出兵不得却多寘
索梯從城上夜出奇兵掩擊賊若以資勝捷如違

者當行軍法施行

西夏本末

公門客滕達道龍圖布衣時公尹京而滕年少頗
不羈往往潛出狎邪縱飲公病之一夕至書室中
滕已出公因明燭觀書以俟意將媿之至夜分乃
大醉而歸公陽不視以觀其所為滕畧無慚懼長
揖而問曰公所讀者何書也曰高祖傳滕曰漢高
祖何如人公逡巡而入

東軒筆錄

公言關中民苦轉輸請建鄜州之鄜城縣為軍以
河中同華中下戶稅租就輸之春夏徙邊兵就食

可省糴價什之三他所戡不與詔名其軍曰康定

錄實

公知慶州兼管勾環慶路部署司兵馬至部即奏行邊以詔書犒賞諸羌閱其人馬立條約為信凡讐已和斷輒私報之及傷人者罰羊百馬二已殺者斬負債爭訟聽告官為理輒質縛二人者罰羊五十馬一賊馬入界追集不起隨本族每戶罰羊二質其首領賊大入老幼入保本若官為給食即不入寨本家罰羊二全族不至者質其首領諸羌

受命悅服自是始為漢用

長編

慶曆元年三月任福等既敗朝議因欲悉罷諸路行營之號明示招納使賊驕怠仍密收兵深入討擊詔公體量士氣勇怯如不至畏懦即可驅策前去乘機立功公言任福已下勇於戰鬪賊退便追不依韓琦約束因致陷敗此皆邊上有名之將尚不能料賊今之所選徃徃不及更令深入禍未可量臣非不能督主兵官員須令討擊不管踈虞敗事之後誅之何濟惟聖慈念之其廊廡路罷行營

文字臣且令所部許懷德收掌別聽朝旨臣一面
依此聞報夏竦韓琦商量申奏如所議未合乞朝
廷取捨臣方待罪不敢久冒此職妨誤大事從之
於是行營之號卒不罷兵亦不復出

實錄

慶曆詔諸路轉運使副提點刑獄察所部知軍知
縣有治狀者以名聞議旌擢之或不如所舉令御
史臺劾奏並坐上書不實之罪從范仲淹所請也

通鑑

和魯公有觀畫鷹獵兔詩云雖是丹青物沉吟亦

可傷君誇鷹眼疾我憫兔心忙豈動騷人興惟憎
獵客狂鮫綃百餘尺爭似製衣裳文正公觀之歎

曰真仁人之言也

筆錄

宣和五年經畧宇文虛中奏故叅知政事范仲淹
知慶州築大順城為一踞杆蔽辟洛苑副使种世
衡知環州至今諸路戰守之備多二人規畫今慶
陽府有仲淹廟環州有世衡廟合古者有功於民
以死勤事之法乞各賜廟額詔賜廟為忠烈世衡

威靖

東都事畧

論元昊所以臣服

蓋自天聖中曹寶臣嘗語王駿曰君異日當柄用
願留意邊防因以元昊桀捍語之時德明尚無恙
也其言至寶元而驗寶元以來逆雛犯順忘食肉
衣綺之恩肆猾夏亂華之虐懷敏福平以將自詭
有克毅剛愎之態無克國老成之慮其勇而無謀
不能辦事當時志者已預占之矧如夏竦設心措
慮但欲進擊一聞持重堅守之師則杓鑿矣自為
總帥端坐長安四路軍政遙聽節制其誤國債軍

之罪自不能掩於張方平之一疏由是好水之後
任福不能嬰其鋒定川之役劉平不能遏其勢遣
使至境范雍不能明其詐遣人納降士彬不能察
其欺當其時也天子不得怡宰相不暇食百官不
敢退安於私第中書置議事之廳群策集經畧之
幙韓公不肯袖手於大事當決之時富公不肯結
舌於虜使可斬之日小范老子胸中數萬甲兵略
展布於代回國事之頃請出兵者有呂夷簡言官
兵不如鄉兵者有田况身為體量使而知四路屯

兵之數者有王堯臣王守忠監軍之命不行夏竦
通唵厮囉蕃族之議復寢張奎鑄錢之請既上歐
陽脩通漕運擢商賈之策復施我常有以破元昊
而元昊終不請降於我也以鄜延一路觀之狄青
擊之於保安許懷德破之於永平入金明則見困
於周美至延州則見摧於王信以涇原一路觀之
虜寇三川王珪敗之沮其兵虜在白豹任福克之
制其兵以河東一路觀之在麟州則張元易旗幟
以誤敵其衆大潰在府州則張吉築城陴以堅守

其賊果遁至環慶一路所在自為守備相為牽制
者又非諸路之所能及青澗既成則以种世衡懷
環州屬羗自是人精於射虜不敢近大順未成則
以范純佑促慶州版築自是城寨截然虜不敢入
一韓一范之謠屹然為天兩柱蛇豕膽喪犬羊屏
息有以也夫於是議和之使至于境上者一至于
范仲淹者再至于龐籍者亦再然猶未敢保其無
他而輕許之也暨夫遣使納款者一遣來奏事者
四然後賜誓之使不得已而出疆嗚呼羽檄交馳

之間勉於支撐拯救之圖玉帛相尋之後亦不廢
惕厲憂虞之心擇武勇於陝西選武臣於諸路諄
諄然綸紵之明揚以和好為權宜以戰守為實務
鯁然摺紳之論奏募入粟以助邊出內帑以助邊
搏節三司用度之數蓋其持危益深而防閑益密
救敗扶傷而經畫多未嘗窮追遠討以強兵而來
懲去備無大勝亦無大負未嘗急征暴斂以豐財
而量入為出不至有餘亦不至不足每觀夏竦范
雍經略西事之日與韓琦范仲淹經略西事之日
勝負利鈍大略可攷信守備亦惟其人而已不然
以跋扈之元昊初而帝中而男終而臣者又豈無
所自耶

劉漫塘先生論本朝人物曰南渡前范文正公

合居第一

語錄

義莊規矩

先文正公於平江府興置義莊調給宗族德澤至厚其始定規矩雖有版榜不足久傳及有治平元年所得朝旨亦未揭示族人兼有後來接續措置可為永式者未嘗刊定深慮歲久漸至隳廢今盡以編類刻石置于天平山白雲寺先公祠堂之側子子孫孫遵承勿替今具如後

一逐房計口給米每口一升並支白米如支糙

米即臨時加折

支糙米每斗折白八升逐月實支每口白米三斗

一男女五歲以上入數

一女使有兒女在家及十五年五十五歲以上聽給米

一冬衣每口一疋十歲以下五歲以上各半疋

一每房許給奴婢米一口即不支衣

一有吉凶增減口數畫時上簿

一逐房各置請米曆子一道每月末於掌管人

處批請不得預先隔跨月分支請掌管人亦

置簿拘轄簿頭錄諸房口數為額掌管人自

行破用或探支與人許諸房覺察勒陪填

一嫁女支錢三十貫七十七陌下並准此再嫁二十貫

一娶婦支錢二十貫再娶不支

一子弟出官人每還家待闕守選丁憂或任川

廣福建官留家鄉里者並依諸房例給米絹

并吉凶錢數雖近官實有故留家者亦依此

例支給

一逐房喪葬尊長有喪先支一十貫至葬事又

支一十五貫次長五貫葬事支十貫卑幼十

九歲以下喪葬通支七貫十五歲以下支三貫十歲以下支二貫七歲以下及婢僕皆不支

一鄉里外姻親戚如貧窘中非次急難或遇年饑不能度日諸房同共相度詣實即於義田米內量行濟助

一所管逐年米斛自皇祐二年十月支給逐月餼糧并冬衣絹約自皇祐三年以後每一年豐歉椿留二年之糧若遇凶荒除給餼糧外

一切不支或二年糧外有餘却先支喪葬次及嫁娶如更有餘方支冬衣或所餘不多即凶吉等事衆議分數均勻支給或不給即先凶後吉或凶事同時即先尊口後卑口如尊卑又同即以所亡所葬先後支給如支上件餼糧吉凶事外更有餘羨數目不得糶貸椿充三年以上糧儲或慮陳損即至秋成日方得糶貸回換新米椿管

右仰諸房院依此同共遵守

西夏地形圖



蓮花堡在鎮戎軍西南與德勝堡相連又定川砦諸葛亮城皆在鎮戎界嘗有蕃賊至此公遣張建侯往救應

長武寨在涇州西賊寇邊公與都監張肇部領軍馬離邠州取長武路往涇州策應後又聞賊分軍回奔保安軍上面公又差巡檢宋良蕃部巡檢趙明部領蕃漢軍馬往長武把隘

萬安鎮去保軍八十里初延州有一將軍馬在保安軍駐劄費用糧草供應不辦公乞將保安軍所



駐軍馬抽退於萬安鎮就食糧草却將萬安鎮一將軍馬抽退延州亦只八十里

馬鋪寨通近後橋白豹寨每有賊馬出來公修此砦時兵馬不多只是據河西山坡特重下砦不與追逐其砦城十日內泥築并泥飾了當

木波寨在環州正當賊來大川路惟賴諸寨蕃部熟戶同共防托公恐熟戶二心未可倚仗遂保舉种世衡知環州以牢籠蕃部

定邊砦在環州公嘗令劉貽孫至此相度葫蘆泉一帶立寨接連鎮戎軍去處

明珠滅滅二族在環州之西鎮戎之東二族之北有葫蘆泉公併兵於其地修起城寨招撫二族

華池鳳川平戎三寨皆在慶州東平戎去延州德靜砦七十里華池去德靜一百一十里鳳川去德靜一百二十里公指揮慶州并諸寨並權住入中白米却告亦客旅並令於東路延州接界平戎鎮添價入中白米

慶州路有美泥虐泥大板城等處小砦公只差兵

士百十人防托如賊馬大段入寇便令歸側近大
城寨內一處防守所貴不致枉陷軍民人心稍安
薄家莊在岢嵐軍火山軍之間公以火山軍城中
無水兼地窄狹難守奏乞於中路薄家莊擇地共
修城寨

東關城在岢嵐軍水寨外公以岢嵐城小將東關
城築作大城檢計到土工五十二萬七千九百四
十五工

神堂堡銀城寨在麟南五十里公令經略司相度
興脩令人戶耕種住坐續脩神樹寨并堡子府州
於鞋斜谷端正平等要害處置大寨兩坐又置堡
子三坐

篳篥城在秦州田况嘗請修築公奏乞依田况所
奏早賜指揮

佛空平明珠等族所居公嘗令將偕燒蕩其地族
帳

金明城在延州公奏議近重修金明城且托得壯
面又東北廢却承平南安長寧白草等寨後東西

四百里更無藩籬可以禦寇候金明城了方修寬州以禦東北

鳳川寨在慶州東城被山坡直下臨注或有西賊圍閉矢石入城禦捍不下公牒李丕諒宋良同往鳳川相度得本寨東烽火臺山上四面牢固及山脚下有好水泉可以置寨令弓箭手兵士等夤夜興工山上只築女牆四面削崖近下低處築城圍入水泉續又牒本州通判范祥相度令新修崇城分擘街巷修蓋軍營倉房草場解署及城上皆安

置敵樓

唐龍鎮與契丹對岸在府州之北豐州之東其東南火山軍對岸公奏乞招誘唐龍鎮七族人口

故寬州在延州東北三程公言昨廢却承平塞門等砦惟此一處取為控扼蕃賊牒監修官相度一併下手修築後又奏乞以寬州城為青澗城

鄜城縣在鄜州南至同州河中府各四程北至鄜州兩程至延州五程公乞朝廷建鄜城縣為軍以康定為名管鄜城縣并於同州割一縣為之屬建

倉敷營房所有同華河府苗稅於此送納後公又
令知鄜州李丕諒相度丕諒差劉襲禮將帶匠人
往鄜城修展城墻高一丈底濶四尺五寸面收一
尺五寸蓋馬棚瓦舍三百間繫得馬二百疋安下
得兵士四千五百人兼修露圈二十八箇計度到
二萬九百九十五工

延州城在寬州東南四十里公嘗請於朝乞以延
川縣為延川城云彼中人烟不少更有井泉勝於
寬州城

肅遠馬嶺定邊永和安塞等砦在環州界初諸寨
城墻低下壕塹淺狹公牒環州那廂兵軍士及和
雇人夫修築

細腰城公令蔣偕等所築公又勘會本城至環州
定邊砦三十七里西至鎮戎軍乾興寨六十里南
至原州柳原鎮七十里量其地界遠近所修城寨
地土并側近蕃部元屬環州兼本是環慶路擘畫
修建兼細腰城東北板井川是西賊來路在細腰
城定邊寨之間係屬環州地分緩急若有奔衝即

文正公集
須定邊砦與細腰城互相救援就環州節制甚順
奏乞朝廷撥屬環州

萬安寨在延州西北往保軍路中路舊無城砦公
差周美郭慶揚麟部領延州膚施兩施人戶并廂
軍脩築計度到六萬一千六百五十七工并修築
敵樓戰棚

豐林縣地在延州東二十五里就崖為城青化鎮
在延州東六十里公差陳永圖部領臨真豐林兩
縣人戶修築計二萬六千五百五十二工

甘泉縣城在延州南八十里公差任世京部坊州
丹州人夫修築計六萬五千三百四十五工

承平砦在延州東北二百里在青澗城西八十里
把截得承平川大路寨北大里河約六十里自来
蕃族在大里河北居住公嘗請復修此砦以遏蕃
賊不使過河云初修之時則部署司那兵馬大為
之備畢工之後只銷得二十人駐劄

南安寨在延州東北二百七十里在青澗城正北
七十里北至綏州四十里去無定河二十里公嘗

欲修之以其去水泉稍遠朱吉种世衡欲於青澗
城壯四十里商館鋪南安寨中路創修一山寨
栲栳寨在延州北八十里嘗為賊所破公相度舊
砦南五里地名龍平口興置一寨把截安遠塞門
龍口川賊馬來路

胡家川寨在延州初胡繼諤乞修鷓子城公差殿
直楊麟興工麟州申稱計七萬四千工恐難了當
公遂差推官何涉與胡繼諤相度於胡家川莊北
面書按山上修築一砦計三萬三千餘工下面川

口是德靖砦保安軍來路地勢委是要害只差本
族熟戶人工官給口食拜差廂軍三百人徃彼助
工

三關城在延州公牒招討邠撥諸州差到兵士五
千人興修

義蓮鋪在延州康定二年四月公差使臣趕殺西
賊抵此奪得人馬駱駝牛騾

牢山驛新店驛在麟州至延州一百六十里間嘗
因朝臣上言減廢公嘗與明鎬至此軍馬疲乏無

支請草料去處公言鄜延路寂是屯兵去處日有軍馬及使命過往遂牒延州修補二驛每有過往使命軍馬或遇晴明直到中路甘泉縣即支給一日口糧等物若遇雨雪及山河水漲即於新店牢山止宿

葫蘆泉在環州定邊砦與鎮戎軍乾興寨相望八十之間為義渠朝那二郡之阻其南有明珠滅滅之族公嘗言能進兵據葫蘆泉為城壘壯斷賊路則二族自安宜無異志後竟於此地築城招服明

珠滅滅二族

永洛城在朝那之西秦庭之東公嘗奏言策應軍馬由儀隴二州十程始到如能進修永洛城斷西賊入秦庭之路其利甚大非徒通諸路之勢因以張三軍之威者也

書范文正公集後

芑既受命

直指康臺訂次韓公集矣復次范
公集為二十四卷賦二卷詩三卷
義說論贊頌述一卷奏議四卷劄
狀一卷表二卷序記一卷書啓三

卷尺牘二卷祭文一卷碑一卷墓誌銘墓表三卷年譜年譜補遺以別集首本傳褒賢碑墓誌銘遺事義莊規矩西邊地圖附錄於後聚而譚古今相舉范文正公輒相與嘆惜臣為莫可及三尺孺子聞之

皆若欣慕焉則何也嘗攷公自少時有志于天下先憂後樂不徒託諸空言故所至尸而祝之即守吾饒至今血食自山林處士閭里田野之人莫不知其名字而樂道其事遐想公存日不知又當何如也

竊恠公之為相也負西賊破膽之
譽朋黨方起高若訥輩眈眈伺隙
邊奏疑若有警公輒請自行邊又
輒請韓公與俱進觀察使請無落
學士名赴闕請留不復顧人之議
其為邀功為植黨為固位公固以

天下為己任者如此乎自信不疑
豈不難哉雖然公在興化僅一令
身蒞通秦楚海民夫築海堤百五
十里以衛民田役夫走驚濤旋濤
而死者百餘人堤成而田腴民至
以范為姓今所稱范公堤是也無

故大興畚耒調發四州民夫不無
騷動糜金錢驅百餘人於驚濤非
細故矣當時嘗有謂其迂濶謂其
狂言者有遽誣以事者竟無一語
指摘及此不可解也母亦謂百姓
獨其利故不得摘之耶宋之人心

猶近厚也蘓長公坐詩禍連竄海
外阨窮終身李定輩所為捃摭文
致不遺餘力若其守杭州亦築堤
西湖上六橋烟柳極遊觀之樂又
非如公之得請而興工者也而其復
葑田之心即公衛民田之心議者

亦不及之與公俱得以姓名堤然
則宋之人心猶近厚也

己酉二月望日屬吏毛九苞誤



亦不在此之類也
則宗之人心猶是得也

也百二子望曰屬夫是也

